

^20  
3577  
1



120

3577

1

笙月詞 花景詞 增

縵雅堂駢體文

歐齋題眉


光緒六年庚辰  
二月娛園開雕

序

同治五年馬端敏公撫浙以舊籍散佚勅設書局羅名雋  
士實其中時余客端敏幕與孫丈琴西高丈伯平實贊成  
之山陰王廣文眉叔最後來與校讎之事久遂與余識後  
局移戴園居益近過從益數而局中諸君或以科第去或  
得官去不則載筆劄游四方以去獨眉叔貧老守局中且  
善病余閱其寂寂也思有以慰之恆招之至至則爲余商  
榷文字有疵累必言言無不盡已卯榜後眉叔益不自聊  
余謂眉叔曰君老矣復何欲眉叔蹙然曰余何欲也大功  
盛名吾欲之不及媿媿富若貴吾不敢欲欲亦未必能得  
獨生平仰屋捫腹噴心血積紙盈尺脫不覆瓿後世知有

誰某姓名此不能無欲者余爲之懼然以悲眉叔所爲詩  
古文詞甚夥既自刊笙月詞余乃取其駢儷文若干卷屬  
自點定謀同人集貲刊之眉叔感余意退而泣下者數四  
蓋庚辰冬閒事也臘垂盡眉叔將以歲事歸手其文來付  
余且言別余謂春閒當成書報君旣度歲以文授工工未  
半而眉叔之訃至矣嗟乎士窮困抑塞束手不任天下事  
至其老也僅僅出其餘作爲文詞欲自附於傳人之後而  
卑賤無貴顯交其所著述率不過一人一家之言於世無  
大關繫雖傳亦不能遠而天或且靳之如眉叔之文幾幾  
可傳矣顧仍不及見其書之成又若或以此而促其年者  
其亦可哀也夫訃之至也余旣爲位哭之因促梓人速其

成猶想中止而或尼其傳也若夫余之不文烏足以知眉  
叔之文也顧斷斷焉爲之序者仍眉叔之志不敢負死友  
之屬也光緒辛巳閏七月仁和許增



王君眉叔小傳

會稽孫德祖彥清

仁和許君邁孫刻縵雅堂駢體文成敘而傳之實光緒七年秋七月之閏蓋眉叔手定以屬許君而眉叔已以其年小孳朝日卒于家不及見矣余世居府城負北郭于眉叔同里聞眉叔長余十年自余識字之始眉叔已有名藝林渴慕之弱小不敢出交英儁故未能識面比經燹難余不克有其先人之廬賃廡于小皋部而眉叔于皋人秦勉鈕總角交也邂逅秦所因是以結文字之契幾二十年余固能知眉叔者眉叔少孤祖母孫夫人親授九經讀皆上口年十有四始就外傳才高好博涉能文章獨不喜制舉業坐是早以詩古文詞受知郡邑大夫拔前茅年二十有五

僅乃得游府學同治二年年三十有四始爲泰興吳侍郎  
師所賞詞賦府學九屬第一以優行補廩餼余亦同時冠  
入縣童子成諸生餼于會稽縣學是歲也方補辛酉拔貢  
連舉壬戌癸亥歲科兩試云丁卯並補行甲子科鄉舉太  
和南皮二張夫子來典試兩浙知名士不屑屑以時文鳴  
者強半彈冠而起余之荒率猶尙忝竊而眉叔汔未得志  
庚午李侍讀文田爲浙闈副考官徐侍郎樹銘以督學使  
者攝監臨前之所遺閫中捫索殆盡皆曰眉叔理無更抑  
眉叔坦率如故有命也非戰之罪眉叔先以將母之故援  
例就訓導凡署金華浦江兩校旣喪母不復仕應本省書  
局之聘由分校至總校同事一時之儔徧交之學益邃密

纂述益富精力與俱耗甫中年而老至可傷也卒之歲但  
微喘氣逆耳以人日夢至一所有傑閣仿佛凌霄漢麗眉  
交肅之登插架萬軸類生平未見書交徵敘焉寤以告其  
子緯遂酣臥不復問人世事越十有八日曰敘成矣有云  
蒼磴砥閣碧練秋味患味字未安也又七日竟卒先有筮  
月花影二詞刻于杭州許君刻者駢體文未斷手也前卒  
一夕猶念之有詩十二卷舉以屬緯已而指窗櫺曙色曰  
東方明矣可行矣乃瞑年五十有二眉叔姓王氏諱詒壽  
山陰人父文鏞贈修職佐郎候選訓導母氏沈封太孺人  
子一緯能讀父書女二並能詩長綺尤才適胡元鼎亦才  
士也昔玉溪生爲李賀作小傳僂天帝成白玉樓召賀爲

記觀于眉叔猶信長吉詩得樊川敘傳世至今若許君者  
何多讓哉

復堂亾友傳之一

仁和譚獻仲修

王詒壽字眉子山陰貢生候選訓導少習法家言游皖南  
三年兵起歸里門性澹逸好古學思心湛湛詩篇雅令閒  
爲南宋人小詞輒工有笙月詞四卷尤精駢儷文字芳潤  
纈密如梁陳人一署武康學官杭州奏開書局訪延學人  
校理踰一二年眉子至同人服其安雅名大起王麟書譚  
獻陳豪施補華尤交契也已而諸人皆宦游君窮悴且善  
病許增邁孫博覽好賢尤者眉子文一日語君曰子今年  
五十矣何不寫定文彙增且任槧人資以爲君壽君遽起  
再拜縵雅堂文八卷刻亟成而君已卒詩十二卷彙臧其  
家子緯



祭文

光緒七年十一月日陽湖汪學瀚平湖徐惟銀仁和許增  
許郊潘鴻張大昌陳霖錢唐濮子潼謹以香醪一甌溪簌  
盈掬龍涎之炷雪谷之冰致祭於

眉叔先生之靈嗚呼鶴歸丁令盼落月兮來無鵬賦賈生  
傷流風兮已盡電光泡影頃成宿草之悲雋語清詞遽醒  
生花之夢竊以苔岑跂舊蘭契思今珠樹仙才玉臺詩格  
倚聲鏤月勝柳七之歌詞走筆鍾霞具蘇髯之興會記拔  
劍而斫地親覘奇氣激昂擬援琴而登牀終歎遺音聞寂  
莫禳龍蛇之歲讖祇餘麟鳳之聲華風燭一朝雲煙萬古  
玉樓何處擬通芳柬而無從瑤情有知爲酌桂醕而尙饗

往時小海吟興如存今日大招靈談定接歌以當哭爰進  
蕪辭來些讀騷藉抒藹悃辭曰  
稽山兮峰青湘湖兮波渟君之居兮寒煙局揚素旒兮駕  
翠輪乘風來兮歆余馨薦梓孟兮酌醪醴望顏色兮雲杳  
冥幽顯隔兮如有靈佩珊珊兮臨吾庭欲見而終不得見  
兮慕馨欬以傾聽願君醉此觴兮鑒故人之微誠

縵雅堂駢體文卷一目錄

恭擬

皇上龍飛親政頌

獨石軒遺集序

秋言自序

亦廬詩序


文學酈君墓誌銘

擬駱右丞蕩子從軍賦

趙壹論

讀葛壯節公年譜書後

仕女冊題詞



漫雅堂駢體文卷一

山陰王詒壽眉叔著

恭擬

皇上龍飛親政頌

并序

臣聞大庭膺籙三辰增玉宇之輝華殿垂衣五緯順瑤樞  
之軌虞后升壇之日寶露凝雲姬王御宇之年榮光幕水  
蓋惟神靈之首出斯瑞應之呈休炳炳乎煌煌乎莫不照  
耀于紫衢網緼于青簡者矣欽惟  
皇帝陛下秉德承圖

累仁嗣構

金繩高握

玉鏡重光湖在

降靈誕寶之年已徵璧合珠連之象故自

龍飛首祚

鳳麻初基承

兩宮皇太后聖善之音布一代

中興之治十年以來

王政之隆可敬述焉夫葺階簪笏不無凶德之共驩桐璧

冠裳亦有流言之管蔡于時

顯皇帝宸游翠輦正慟蒼梧我

皇上誕受元符乍臨

丹宸豹聲自恣敢萌跋扈之心鳳諾頻摹竟矯

絲綸之詔鼠聖狐神之黨肘腋生姦狼貪虎噬之為彝倫

罔顧

國家多故中外生疑遂乃虎衛星嚴龍驤夜

勅金鈇秋厲丹劍晨馳賊潛何處雷行木尺之封獍惡同

誅雨濺藁街之血

九重有慶

萬歲齊呼此誅姦之政為

乾綱所首斷也由是肅槐棘之班重鹽梅之任玉珂上相

秉矩心衡志之風金葉賢王佐方扈邁軒之治几杖

錫論經之傳妙

簡耆英節旌

授分陝之臣詎論資序花虬紫玉非無

異數之頒鶴券金書亦懋勛臣之

賞猶復

鸞章屢下褒及先賢

鴻澤所流不遺孤節此

崇賢之政爲今代所獨隆也且夫狐金鋒毒元靈開玉匱  
之經蠻海氛高丹浦澤素車之旅聖世未嘗捐武荀皇古  
不能無討征溯自粵氛不靖旣結連年彌天逆燄金狼聯  
狗國之芒卷地妖腥銀鵠走鳥飛之隊驛騷逾乎半壁蔓  
延及于百城又西北之興戎共東南而告亂絳頭走戟犬  
羊之眾方張白帽銜刀豺虎之羣襍起

國家承平既久人不知兵草野流離海山簸蕩于是

赫然震怒

分命將臣

天戈一麾陳雲四裂發羽林之萬騎用壯兵威包域外爲  
一家兼驅蕃部驚殘鼻鷲西平入蔡之軍奪得崑崙天使  
張燈之宴血洗大黃之箭鏡吹俱騰頭縣太白之旂鯨鯢  
盡戮百戰百克迅掃腥煙南征北征悉承

廟勝此又

武功之震乎四海者也當鷹武卽戎之日正

螭均進學之年

天寶聰明

聖惟睿哲玉龍階靜時投乙夜之籤朱雀圖開兼講庚鈴  
之策金峰訪道何必赤松琳笈陳經非惟青纂及乎  
天步既安

聖學益懋銘題寶鏡藻生

奎篆之光歌奮卿雲聲合洪鐘之奏益復布

右文之化推

作人之恩星輶玉尺先量使者之才月海珠光無蔽鏡中  
之照麟龍列

陸金箭羅材彩苞翥鳳

日邊琴瑟之樓縹帶迴鸞

天上圖書之府此又

文德之冠乎百王者也他如島夷交臂刑白馬以輸誠中  
使

頒恩憫哀鴻而發粟屢下求言之

詔宏開

納諫之風金雞放而犴獄常虛翠羽焚而鹿裘可法咸皆

秉

珍謨于

宸掖受

懿訓于

天闈紫駟宿春風奉

巡歷之車素練

璇宮霽月布

光輝之德用能

化章坤典瑞應乾文運

皇極之大鈞恢

帝維之宏軌今者

兩宮皇太后退居長樂

皇帝陛下親總萬幾

九天閭闔日麗彤雲百雨衣冠風清朱序黃麟瑞野被

聖澤之靡鴻火鼠窮郊奉

天朝之正朔星明龍體值西陵

嫫祖之歸露沐蠶宮修東館

堯門之禮萬國歸

事親之美普天仰

孝治之隆臣忝列章縫夙承

陶育恭逢

盛典忻溢微忱蒼身枝上知

帝孝之休徵黃鵠池邊識神符之

德感沛

新綸于瑤甸早消玉弩之塵瞻寶氣于霞衢敢效金天之

頌謹拜手稽首而獻辭曰

皇矣上帝鑒在

明德眷命我

朝誕降

聖哲教秉

彤宮

化宣丹敕昔在初基有奸危

國銀鉞飛霜金緹馳墨魁隱授首不動聲色鴟惡既消狐  
火旋息

威申武帳義肅嚴律爰

簡忠智乃升賢良輔仁導義警倦戒荒金樞玉鼎鶴濟鸞  
踏艾綬郁郁蓮炬煌煌

恩禮所接待侍從亦光慎爾岳牧錦節臨疆

九華天語

五雲龍章

溫渥之澤湛露灑灑厥有封狼啖陽當路惟羆惟羆跳梁  
騰驚我武維揚龍躍虎步上承

廟謨遠震

天怒蕭斧截萼洪鑪炳絮迅儷風發捷馳露布秋靜白狼  
歌騰朱鷺寰海鏡清永沐

甘澍

武成既告

文治用垂丹書早拜赤誦同師經橫

紫座講啟

玄暉推論書傳斟酌菽辭



帝學日進

雅化風馳林無雉窟

殿集鳳雛賦獻赤雁詩和玉芝仰承

宏德以鳴

盛時於鏤我

皇憲章

琬緯

慈雲所被

慶澤咸萃

大政始親

鉅綱已蒞雕氣降雱珍露呈味鏡天黃光幕地紫飄

道昭日月祥徵休懿

朝野慶流臣庶忭暍

萬壽無疆

皇風永被

董嘯巖先生猷石軒遺集序

夫神鐵入地虎氣終騰明珠淪淵蟾彩不泯山陰董嘯巖先生南湖詩老陳芳仙人廿年祕笈風雨致其邃思萬里行滕雲霞涵其殊狀積玉成圃擲地有聲黃鶴一去秋嘒等散往者會稽商寶意太史輯越風載先生詩僅十餘首小傳言其全藁已佚蓋甚惜之也蕺橋參軍先生之文孫也祖硯早傳先澤是寶傷青箱之莫守冀錦字之未湮爰乃走燕雲歷海嶠冥按冷肆徧訪故家久之始得舊寫本子閩中某氏合以舊藏編成全集誠芬苑之盛事騷林之至寶矣不鄙禱昧屬弁其首受而讀之揆摛華藻黼黻性情雖主中晚之一格實包晉宋之眾製是故求友之聲婉

以摯託物之言綺以深行役之什瑰以麗攄哀之作沈以  
鬱稽往興感洋洋乎古音卽景流唱落落乎松吹咀其賡  
詠迹彼生平蓋有學養之功焉有游歷之助焉若乃植慧  
妙年扇芬青社擅芳蘭謝生之譽鄙蛺蝶魏收之狂論尺  
讀書稱銖構蓺蕉葉未展縑帛亦以寫詩玫瑰獨笑童僕  
知其得句則二酉集爲少作也一劍長征雙輪遠客折玉  
河之楊柳弔金臺之夕陽白狼秋色寒到榆關元鶴西風  
夜唳竹廟客彈長鋏變酒徒擊筑之聲馬嚼殘芻疑古驛  
催詩之雨則北行集爲壯游也及夫殿前獻賦長樂拜官  
望西山而支版職非馬曹對翠屏而放衙訟鮮雀角觀梅  
之閣堆奇書五千卷粲花之吻啖荔支三百顆則作合時

有鳴琴集也蘿袞一視猿鶴相招焚魚碧山抽帆塵海鹿  
門有屋言歸鬱林之裝陽羨無田又作荊州之客山中泉  
水淨滌吟心雲外高樓橫飛賦筆則去官後有解組集也  
貞曜莫潛壯心未已黑水靈關之險青天蜀道之難夜雪  
一鞭爭行虎巖之徑秋濤萬壘倒吹龍蜺之風青鱸海上  
長吟叩舷紅毛城頭高唱和角則入蜀渡臺二集成于中  
年也及夫倦翮還林歸雲棲岫石丈無恙獨坐可以晤言  
橋奴猶存千頭藉之給食于是讀道德注南華參青髓之  
精尋玉池之祕紫房碧宇所思乃在帝鄉禪榻藥爐妙悟  
生于靜境則息景學道二集爲其晚歲所作也訂卷十二  
合篇千餘青字蟠胸吐煙雲而萬變寶氣滿紙鑄今古爲

一家白太傅之篇章早見雞林爭購孔巢父之詩卷固宜  
天地長留然自散佚以來已逾五紀假非葢橋搜訪之勤  
則亦比之稽康廣陵之散竟成絕響昌谷錦囊之句終淹  
溷中耳玉盧誰守篆麟不磨雖曰數存亦賴後人之賢矣  
詒壽感流風之已遠頗憾遲生幸白雪之成編快茲先覩  
蓋誠不能已于言云

秋言自序

壬子之秋假榻宣州署齋老屋十笏青山半牆雙桐覆庭  
苔痕緣城金飈振厲脫葉亂飛渺兮予懷悲哉秋氣況乃  
素屏燭景涼湍潺潺清砧三更明月千里其或暗雨灑窗  
冷枕阻夢玉河無景白雁有聲莫不感動羈客觸念鄉關  
青鏡有流年之悲碧雲結美人之思同居之客秣陵汪子  
臨甫會稽胡君赤城乃相約舉清尊之局申養夕之歡主  
客迭爲談讌竝作雄雌論劍甲乙品香齊諧志怪東坡說  
鬼雄雞既号哈笑未已亦有慨海宇之多故念修名之不  
立酒薄不醉卿言始愁然而苔岑良契共此流連桂樹王  
孫何傷偃蹇今夕止談風月當世自有夔龍聊以解憂無

關清議憑臆而發小言爲多筆而存之亦鴻泥之印矣敬  
亭十月梅花欲開白雲不飛征舸將發爰稍排比成卷書  
其緣起于簡端他日者爲風之搏爲霧之隱思而不見天  
各一涯酒醒衫寒燈青漏永冀展此編如親語笑也

沈竹虛亦廬詩序

彎彎流水花疏竹野之間宛宛書堂茶熟香清之候竹虛  
先生于是提挈鷗鷺夷猶琴書拓雲霞之靈攷渺松石之  
幽趣秋月入戶滌古研以露華春聲隔簾苔林禽之風遞  
長歌塵外真人天際矣詒壽與先生忘年訂契彌日言驩  
款松風之關雙鶴迎展酌花間之酒一蜨上衣瑤襟旣諧  
瓊笈斯倒遂出示所著亦廬詩四卷臨風一歌亂墮珠玉  
口香三日如餐茯苓夫秋士工愁咸極鬱伊之思羈旅善  
感不無蕉萃之吟先生少嬰痼疾長謝纓綰種桑百株有  
田二頃資身裁給于世無求蕭園良書悅觀于曠且長統  
樂志安神乎閨房天籟自鳴清商閒發寫南風之雅操谿

壑迴其春姿傲北山之白雲金碧謝其麗績無託怨悻之  
旨獨奏鏘洋之音飄乎欲僊淡而彌雋斯蓋存乎其人莫  
得而強也詒壽以單寒之身加之牢落飢來驅我鬼能笑  
人隱南郭之几印天而噓跨東門之馬愁思忽至綵雲有  
日暮之感綠水興君子之嗟詩以言情歌惟當哭以視先  
生之雅抱冲襟良滋愧矣芸帙在手風琴忽聲刺船海上  
期成連之移情散髮山中讓孫登以獨嘯

文學酈君墓誌銘

君諱文杰字仙舫山陰人也黃扉舊裔青箱世門曾祖某  
祖某皆邑諸生父某以法家言游大江南北生君子宿遷  
故君又字遷林石麟之譽摩頂于導師家禽之對流慧于  
卯歲年十六始歸里門僕以苧末之誼遂辱壠畔之隨君  
閱曾有珠落唾成玉張郎詩骨天遣栽花昌谷鬼才句多  
積錦跌宕自喜流連多情當夫原上草長隴首雲飛往往  
紅衫睹唱青尊索飲騎羊入市人皆詫以爲仙鬪雞聯句  
我當避之三舍不樂爲制舉之文學使者將案臨僕數以  
爲言始稍稍畱意一篇跳出便成才子之文千人軍中遂  
樹漢家之幟補博士弟子員一應秋試復屏棄鉛槧一肆

力于詩又工詞曲曉風楊柳之吟秋雨梧桐之唱播響于  
箏館踞席于邃家至于樞寫丹青刻畫金石靈稟所赴神  
手自工才者人所難年少不廉是之謂矣君目無等輩氣  
凌滄洲既不善治生家日益落所適又多阻黃金易盡青  
眼莫逢跳蕩之氣漸摧身世之感彌軫步兵縱酒磊塊難  
澆三閭問天草木皆成積此孤憤遂成幽憂未幾丁父艱  
君舉聲一哭嘔血數升鶴弔空來雞骨可把明年配鄭孺  
人又以暴疾亾傷此嘉耦思其淑儀明月虛室難消騎省  
之悲秋雨茂陵益甚文園之病以咸豐某年月日碎于里  
舍年僅二十有七嗚乎哀哉君所箸有浣蓮室詩詞及樂  
府雜曲數種殘藁畸零多未寫正而金鑑已掩玉樹長埋

楓林之夢不來廣陵之散將佚僕也腹痛三步未忘生平  
之言淚滴重泉空抱人琴之感蓋滋愧矣其家將以某年  
月葬君于某原爰爲之銘曰

君之度兮翩然美冠玉兮神仙君之才兮秀絕思澣月兮  
冰雪嗚乎君兮旣豐于才何嗇于祿恨巫咸之下召兮惜  
修齡之莫續將羽衣兮吹笙駟玉蚪兮紫清抑海天以長  
歎返鸞鶴兮瑤島埋玉兮沈沈與君永隔兮傷我心作銘  
詞兮貞石千載不磨兮土蝕莎侵

擬駱右丞蕩子從軍賦

虜騎憑陵未解圍迢迢瀚海羽書飛三時陳氣連烽火萬  
里秋風吹鐵衣鐵衣遠戍幾時旋蕩子一去年復年馬蹏  
踏塞艸雁景斷胡天寶劍磨霜冷雕弓抱月圓曾持畫戟  
隨都護幾逐朱旂扼左賢戰壘乍看花似血寒沙又見雪  
連川若乃飛狐古塞黑鵬舊城犯煙塵而乘障選驍銳以  
列營一軍隘道邊風勅半夜陰山獵火明磧裏雁刀凝凍  
色雲中鼙鼓動雷聲大呼先登震山谷生小幽燕慣馳胡  
旣突陳而鵠擊亦給敵而猱伏龍驤漢將奏金笳獸散胡  
兒帶霜鏃朔酒香催駱乳紅燕姬豔擁貂榆綠蕩子從軍  
有樂時空閨倡婦獨含悲銀泥裙寬蛟蜺帶鈿雲髻亂夫



容絲朧朧寶鏡芳塵暗滴滴銅壺漏箭遲鐙何喜而結藥  
鵲何事而繞枝玉關短蘧吹楊柳征人此際應回首淚洗  
花顏妾自憐夢迷榆水君知否傳來消息鬱金堂戰士紛  
紛盡返鄉合歡檢麝合連夜製鴉黃明珠絲履死央繡小  
朵瓊釵玳瑁裝萬一朝來妝乍就藁砧歸騎繫垂楊

趙壹論

悲夫燕昭王之不作何處黃金之臺平原君之云亾空作  
墨絲之繡供元瑜以艸具安問高才屈子昇于馬坊等之  
賤客片言見辱淮陰與寓客之悲廣坐方開江夏有吳兒  
之叱甚或骨傲遭讒才奇得甌平戎谷口長聞夜哭之聲  
漢陽江邊尙有不歸之鬼士生斯世不獲求申于知已千  
古傷之矣然而一介之士小異恆眾器非荆璧才謝國華  
轉得扇白望于縉紳致青眼于賢達流覽史冊何代無之  
嘗讀後漢書趙壹傳尤不能無惑也或曰炎靈再興皇風  
播美當壹之時士大夫方事延攬故高卿儀鳳流美譽而  
振采季英牧豕伏長垣而見知趙文楚之驅車榮陽綬解

黃世英之就道伊洛書迎孟玉飲冰太守之榻特設孝威  
采藥諸侯之贄屢來凡此之倫咸章當世壹之遭遇亦會  
其際耳不知斯諸賢者其高世之學絕俗之操實足以致  
車騎之候門冠劍之竦立幅巾雍容處之無愧而壹初見  
擯于鄉鄙既抵臯乎髡鉗本非葆素之良士有同雕青之  
少年其竊鳥之賦疾邪之篇又無海隅賦鵬之才矣肆君  
門信犬之詈徒以上計一語見合于袁逢舉聲一哭得通  
于羊陟乃至朝賢並論坐分佩玉之班良璞相期申以泣  
血之剖何其幸也且夫宏通巨子魁艾石師與壹後先同  
時而不獲一遇者亦多矣孟嘗高節莫年爲伏莽之人王  
符不升孤憤箸潛夫之論西河俊彥誰問名山范陽病夫

空歌抱玉而壹歎以薄植暢茲榮問意者將束志道德之  
府蹈節禮讓之林懋箸儒風藉荅知已不此之慮乍脂歸  
轄卽謁當途趨迎稍羈悻然又邁斯蓋將命之偶失不關  
吐握之無心遷怒主人先違忠恕及乎追書謝臯尊以所  
天抒企德懷風之誠極氣結汗流之致猶復恃其穆愕不  
少平心逞曲詆于報章肆橋言而無忤世豈有寶行之士  
而若是者是直西州一矣男子耳嗟乎嗟乎士類不齊眞  
賞安在非必如葉之好龍羊之夸鶴譬之碧盧混龍淵之  
瑛猗頓有時而見惑縞鐵飾鸚膏之采風胡粹遇而亦驚  
故士勿論賢不賢但論所遇之幸不幸古今之際大都皆  
然可勝慨哉

讀葛壯節公年譜書後

嗚乎大樹飄零何處將軍之壘靈旂風雨長聞叱咤之聲  
彌天之毒箭難消橫艸之雄心竟遂吾讀葛壯節公年譜  
至定海殉難事既誌以詩又書其後良以燕領虎頭空濺  
沙邊之血鼻鳴鵬嘯已成海上之癰問厥咎其誰歸爲浩  
歎而莫置者也方其墨經從軍丹心莅事秉王母委身之  
訓矢岳侯涅背之忠畫角動而蛇鳥張大旂樹而風雲變  
周德威有知兵之號賀若弼本大將之材指麾以運神機  
陳氣如墨談笑而禽黠虜敵膽皆青銀駱橫飛誓埽么麼  
之迹水犀突擊方乘颺火之鋒何圖呂姥蕭孃早驚鼙鼓  
狐神鼠聖偏慣譎張倏成噓蜃之樓遽許刑牲之議公以

爲犬羊之性不可恃也豺虎之眾不可馴也不令其觴輪  
莫返則

國威不申不使之窮島震聲則窺伺未已雖爭之甚力而  
眾議益堅公之憂于此深公之歎亦于此決矣無何提孤  
軍于遠嶠憑三里之危城宿將籌邊方繕甲以防變元戎  
高臥乃受給而不知及乎寇氛既深異議又起宋卿子之  
爲將但醉安陽之觴南霽雲之乞師不發賀蘭之騎盡勒  
蒼頭之旅自衛中軍全收金翅之船但催陸戰公全無退  
志益厲軍心此城是王羅家貉子誰過一軍結亞夫營龍  
首獨犯擊懸輪而灰滅阿童是水中之龍橫雕戈而電馳  
高昂亦地上之虎然而守衛勿苟雖墨翟無以措也眾寡

過縣雖孫吳不爲功也墨騎星稀絳頭霧涌天鷲亂起火  
雉難投援絕矢窮孤城告陷公知事不可爲乃結冠纓解  
肘印北面再拜仰天大呼身輕一鳥直衝雀步之羣怒裂  
雙眸力斬狼頭之帥刀光閃而血雨射殺聲急而人頭飛  
鈇期之額中刃破面重登彭樂之腹受槍截腸再戰六日  
六夜誓殉殘軀十盪十決敵呼神勇嗚乎落日慘陳雲之  
色鬼馬騎歸陰風吹天王之旂將星飛墮公之歎事可謂  
烈矣夫渥洼之驥拘于繫則無以絕塵繁弱之弓去其櫟  
則菽由命中假使公當日者重兵在握竟登淮陰之壇乘  
利而前不受王渾之節吹銅起旅浴鐵驅羣劍十萬以橫  
磨箭一傳而四應當必埽高昌之眾迴首卽消匪直守孝

寬之城百道可應雄威讐遐服捷羽報甘泉庶幾虎步龍  
驤高勒山頭之石螺髯鷹目永消海角之腥柰何以衛霍  
之才受制于愚妄卒致長城自壞強敵日張蔓漸難圖悔  
將何及斯則寒沙折戟尙未銷沈夜月迴潮終餘悲咽者  
矣

費曉樓仕女畫冊題詞


仕女冊十幀丹徒費丹旭曉樓之所作也鳳窠羣女蘭麝  
列花霓裳眾仙桂露濯景意之所寄綺其麗矣予友鄭君  
子華旣忻得寶遠寄徵詞時則淒商蟲階隴月蟬幌單枕  
無寐秋釭自明予乃蒸沈煙薦文錦發霞韜展雲帙則見  
珠椽結花網戶洞月朱塵以鏤翡作綴元墀樹瓊木爲籬  
紅櫻垂幔珍羽窺而無言黃蝶上幰雪毛起而將撲其閒  
有麗人也峩峩玉鬢媮媮丹笑竝鉛臉而勻露犀籤翠波  
翩蕙衫以當風麟帶颺翠擡衷掠鬢如聞釧聲擗袞結囊  
疑度麝息亦有絳蛺蝶夕素蛛媚涼蕩壁曲房茝疏離榭  
半臂添絮銀葉之香乍熏雙髻吹笙杏花之景滿地橫珣

瑟于綠麋之几罇紺褰于金鷓之屏酒暈初上喚霞融脣  
睡情將來春漪澀暎加以采蓮船窄花迷素腕之香折梅  
手纖豔映紅兜之雪蘭巾出浴玉膚紗明紅鞵踏青芳艸  
步小別有眉心皺翠眼尾溜珠待花袍其未來倚碧闌而  
獨立至乃豔思含雨妒鴛暝之未醒斜簪鬆雲羞蛇醫之  
乍褪莫不嬌曼呈態淖約可呼揆豐海之眾香沃鳳蕤之  
寸管娟娟此豸渺渺予懷若通微波斯涉綺想然而都色  
之美魂比之流煙之移而楞巖妙旨悟嚼蠟于橫陳維摩  
法會散天花而無簪且也眞符妍女不無哮虎之故姿摩  
登冶容卽是雕鸞之變相于非想天作如是觀不必懺空  
王熏戒香已足視釵鈿爲棘荆齊鬢黛于燐蔓況夫憑意

所造構象于虛則鶯谿絹中更何異蜃雲海上邪明鏡無  
臺空花有景瑤嬈何處導師將訶還君此圖脩子靜業



感逝吟序



漫雅堂駢體文卷二

山陰王詒壽眉叔著

鐙景賦

朱英墜雲素魄窺戶古雁翠擎涼蛻絳吐乍熠燿以呈輝  
旋依微而凝炷照咸借乎秀華光何羨乎玄圃虛堂宵靜  
幽館涼生綠綺罷弄清吟未成餅花一朵兩朵城鼓三更  
四更跳雨喧瓦飄颻入櫺幢短燄颯颯秋聲黃葉古寺  
青苔別院竹榻僧孤蓮社客散寒入秋旛星明廣殿果落  
定中茶熟香半聞鐘鼓其無聲耿琉璃而獨燦別有瓊樓  
屏迴翠閣簾橫臉波掩苒眉語分明紅垂羅帳綠臥瑤笙  
彈鬢簪小墮枕花輕映逗桁之蘭暈縈入夢之香情亦有



空房膽怯單帷寢遲金燼半落玉筍雙垂前宵共景今夜  
相思釵蛾剔玉箏鳳沈絲風濼濼兮欲颺情依依兮爲誰  
況乃江店人稀戍樓角奏客路黃昏離情紅豆馬嚼芻殘  
雁唳雨瘦宵聲四起涼夢未就渺鬢景兮何處檢淚粉之  
在袖若夫鳳簾金鎖犀權玉鉤熏籠倚翠被含愁花外  
之龍鐘未動月中之羊車不畱夜宴西宮之火落葉長門  
之秋莫不珠箔綺幽金膏藻夕暝殘曙而星微畱深更而  
痕碧縱相對之各方乃流輝之合轍歌曰洞房窈窕鎖蓮  
枝蚪箭丁丁欲咽時長夜文通賦明釭謝朓詩清光如夢  
簾垂地爲問悲歡知未知

甘肅武威縣知縣張公墓誌銘

夫尺緒縈杼不能成雕錦之鳳寸鱗伏藻難與言雲津之  
龍故奮功名于戎馬之中有大才者斯效闕措應于赤緊  
之地非咕嗶者所勝若乃振轡絕塞績蕤乎羽旂弭車大  
邦譽夔于金玉三軍若雲霓之望萬口合神父之呼如張  
公者其庶幾卓犖才矣公諱繼昌字愚亭山陰人也西都  
鼎胄世箸簪纓東浙名門業傳細素曾祖某祖某皆潛德  
勿耀葆貞里閭父贈公某冀北逸材駿足未聘征南幕府  
美望早騰生公兄弟四人公其季也靈奇所鍾已徵于鷲  
集明慧之質咸許爲龍超幼值多故長而屢空執贄無雁  
或解鳳衣煮字不糧安謀雜饌袁虎詠史乃上運租之船

伯龍苦貧亦逐什一之利儒業勿終非其志焉旣而贈公在陝西得足疾倦游思返脂轄有羈公以潘岳感秋之年動仁傑望雲之慨行李一肩徒步萬里虎落蛇鄉之地芘屨屢穿餐風虐雪之天短衣誰伴閒關彌歲始抵所居卒致安輿迎歸故里擊鮮數會豈必陸賈之裝問肉得餘有逾曾元之養融融二老宗黨稱焉及連丁大艱哀毀盡禮撫安豐之榻瘞僅支雞行富春之山誠可感鶴服旣闕援例入貲以少尉需次甘肅蓋道光戊子歲也回疆未靖奉檄襄辦軍械劍氣吐耀郭震爲鎧胄參軍盾頭揮豪元康亦幕中快吏旋補渭源典史仍畱軍中踰年遷循化主簿邊俸報滿升皋蘭縣丞旣得棲鸞之所又開射鴨之堂陸

扶溝真清著稱江丹陽風流不墜時則翦長鯨于青海方成龍額之功結醜類于花門復煽狼頭之燄班旂星指戰士雲屯大府以公請于軍務又調理餉事公許

國有心從戎奚謝轉運疏勒之外結屯白阜之陰雖霜銷縞目雷桴殷聞道踵進源源無失干夫給膳嗤赤羽之晨飛萬竈當關謝沙籌之夜唱事平論功升知縣初權會甯會邑有新墾沙田行省議加賦公以爲反裘負薪虞人之失計貨穗償稅韋縵所深悲旣爭不能得則躬勸右門悉貸貧戶畫爲良矩民賴以安乙巳補合水次年調補武威武威者西涼之首劇也紫魚上客鶴益成陰青題贅徒虎冠爭逞公蟬潔守已鷹決鉏投書百函同官服其風

骨拔薤一本豪族震其霜威加以勤民驅春雨之車聽訟  
縣虛堂之鏡昔者見寬課最匪因催科度尙爲政精于發  
擿以公方之曾無多讓咸豐戊申粵寇扇氛軍需苟午公  
以俸入佐餉加同知銜是秋以疾告退既謝事矣刀環有  
日幸鰥鶴之可親巫咸遽來紛旌雁其入夢以是年十二  
月二十六日疾終于甘肅會城邸舍年六十有六歲嗚乎  
荆玉忽折孔松陽之云亾社樹虛栽宋汝陰之不再其時  
長公子適自家鄉來省遂扶公匱回籍公基宇高邃德稟  
仁明旣精理譜亦善家法畫虎有戒屢寄伏波之書佩囊  
可焚用警謝郎之好又況寒谷噓春夏暘蔭樾濟人有鄭  
僑之惠分金敦鮑叔之風故當丹旄歸來之日感動里閭

素車號哭而來悲深故舊配同邑沈宐人礪玉淑質纒蕙  
令儀當戶機聲早宣勞于磬室持家林下謝隨宦于琴堂  
穆穆雍雍戚族號女宗焉以咸豐甲寅六月三十日疾終  
于里第年六十有九子二長容福次端福端福早歿孫三  
謙恆鼎今將以某年月日葬公于某原以狀來乞銘爰敘  
次之而系以辭曰

良金之質喬松其姿道腴內閎德輝外施柳營宣力花縣  
爲政氣壯佩刀智明縣鏡璜璜鉅才秩秩良矩人思其賢  
我聞其語天不假歲倏焉云徂永卽幽室長違昭徒雲連  
鶴柱松奏鸞笙銘勒金石千秋令名

與諸暨義軍統領包君書

聞之銀旂鳥舉捷先乃決勝之師牙帳梟鳴兇醜無久羈  
之勢何則理有順逆杖順討逆者功在必成氣有盛衰因  
盛乘衰者時勿可失故吳子深猶豫之戒太公貴速發之  
機韜鈴所存符節斯合麾下擅丁甲之奇抱龍螭之氣元  
子紫眼陳識蟠蛇黃公赤刀神能制虎運雷霆于掌上珠  
籙飛靈藏甲兵于胷中玉符蘊祕輟耒乎中野倚劔乎高  
峰固將以揚聲洪戈表績隆碣者也自粵賊跳梁三靈震  
蕩虔劉徧東西之域淪胥連吳越之區彌天毒焰甚大槍  
青犢之羣卷地鮭臙盡嚼鐵銜刀之類豕喙噓而廬野罄  
獬牙磨而血肉飛鉞旄孺作笑嬉驅青影爲奴隸人遺碎

玉兔妾充狼頭之娛尉等摸金殘魂哭鼃跳之家含齒共  
憤踐土同悲而乃黑山飛燕徧多助逆之妖白棒老罷曾  
無當道之臥青壘有壞雲之壓銅城鮮鐵版之懸麾下嚼  
齒雷鳴投袂鷹獾能以負山之尺土當倒海之狂氛練  
身合之鄉兵拒鳴張之劇燄鼓以忠義白徒盡是追鋒運  
以靈韜赤手亦能搏賊賀拔勝臨陳而立色不改常畢再  
遇披髮而來敵先破膽縞羽揮而風雲起朱鳥列而神鬼  
趨憑厓立稍磊石卽夫容之樓築土爲城畫地勝蒺藜之  
織用能斬豪帥以金刀揚威聲于銀鎧進一步者死么麼  
之血亂飛在兩山之閒鬪體之臺高峙此誠豪傑自天雄  
略冠世伊古以來鮮見其匹者矣然而隅限之地可始據

不可終憑也畝棲之糧可暫資不可長恃也義合之眾可  
銳進不可老守也及今騰發之氣方舉電擊之威已行鳴  
羣有唳鶴之驚螳黨鮮困獸之志加以靡衣媮食之眾日  
盼旌旆巖棲海辟之家爭儲牛酒伏草義士夜枕霜戈看  
劍才人潛書露布以人心若此以賊勢若彼麾下誠能揮  
盾直出振旅而前將見天鷲一聲怒笳雷應墨騎始縱壯  
士雲趨鐘盜壕于春城解倒懸于黔庶亦猶之奔牛觸縞  
洪鼎燭蓬耳越中既定鼓行而西連官軍于隔江謁大帥  
于節下蕩穢瑤寓策勛  
紫廷拜九花之  
賜天馬如龍

錫萬戶之封黃金似斗豈不盛與乃若守不動之戒失可  
乘之機賊雖屢衄其眾尙盛遲之又久則秣陵之魁桀蘇  
臺之勅渠一旦呼風大集合眾力于絳頭積怒而來築長  
圍于犄角孤村子時外援莫來沙籌空唱轉運之道難通  
銅鼓無聲荷戈之氣漸餒戰士有思家之淚軍中多夜半  
之驚人心解矣強敵乘之麾下雖勇驟賁獲略超孫吳亦  
何能爲哉某等忝列衣冠同懷義憤陳雲滿眼望虎步而  
不前疾雷乘鋒識豹韜之可據敢以鄙誠達之幕下伏望  
慰來蘇之眾慕卽衷甲以長驅三軍大呼一鼓作氣庶幾  
黃狐殘火不污清淑之湖山白馬將軍永誦焜煌之武烈  
臨穎不勝翹足延盼之至

壬戌冬粵寇陷越諸暨包君立身起義守包村自癸  
亥春徂秋賊屢攻之不下時予與王敷庭朱博山丁  
仲泉沈桐屋諸君俱依張仁圃于松谿喜包君之能  
殺賊而危其守孤村而不出也仁圃欲應之約諸君  
先合書勸其出而屬予爲之辭自記

包君通異術能役丁甲其村口地勢絕險隘賊來輒  
歿之山谷閒積礮體如邱以故四方歸之者甚眾文  
士亦多依其幕下眉子此書作于癸亥秋初予爲覓  
閒使達之旋得報書大略言時未至不可出神人擁  
護村必無虞其書甚辯博或云一傅姓明經之詞也  
包終無出意未幾賊益大至連營數十里糧道旣絕

村中泉皆涸人心遂亂包欲出不得爲賊所乘戰歿  
賊屠其村死者近十萬嗚乎浩劫難迴可勝歎哉包  
起義于壬戌之冬至癸亥秋而敗凡十閱月殺賊亦  
十餘萬人詹子又有哀包村新樂府悼其事存詩集  
中丁卯七月重讀是書因附識數語于後 山陰沈榮

荅南社諸子書

桂華秋館銀燭清瑤情寄雲蘭思繪月獲附袞屐之列  
遂展冰雪之篇中心藏之何日忘之昨得惠書語長情重  
兼以篇什殷殷垂詢以投林之窮猿爲識途之老馬拂牋  
雜誦不敢茹默竊嘗周數名勝屈指近代清容振麗于西  
江質園騰藻于東浙龔生虎嘯于吳越郭子鸞翔于湖海  
百年之中代興作者當世閱達亦豈無人然而弋浮譽張  
樞詞振翅竄雉之林爭長夏蟲之族其人有四可得而言  
挾卷朱門投謁華屋夸靡七字諧律千篇頻歲懷人影纓  
金絨之姓氏累牘公餞河梁落日之藻詞取資結納無求  
精思此一類也妖態百端意存駭俗褻績怪險則狐穴取

材文飾淺陋則鳥篆盈簡銑谿虬戶易貌而逞奇桂餌翠  
綸強澤而無當此一類也伏首程格之內茹氣蠹腐之中  
倖獵聲華自恥誦陋竊驪爪于芬苑攫牛耳于騷壇四聲  
僅解乃效玉谿之懶祭六合未賦已同劉晝之馳伏此又  
一類也本無實詣好爲大言桂林湘水笑平子爲無奇篋  
篋白馬以陳思爲可奪塗澤古貌詆媿作者山膏善罵麒  
麟成援此又一類也夫正始之義匪可淺言風雅所趨奚  
云小道僕嘗綜其源流尋其突窟竊以爲華嚴之喻難云  
妙悟蜂鶴之禁亦屬外篇斲梓染絲學在始化宏誦載籍  
以充其氣審別俳僞以正其趨氣充斯厚趨正斯雅然後  
調飛沈之韻極情采之變用能流響中韶造端成化千狀

萬態爐冶在我是故宵魚秋磬之奏豐黛盛鬢之容輓霆  
驅海之勢湍寒石瘞之致或擅專門自成孤詣以諭大家  
終譏單步矧彼荒鄙尙復何語半生矻矻所見如是非好  
高論故肆譏評觸斂罄抱不容隱耳僕虞父憂多江淹才  
盡諸君子抱冰玉之質極討論之精所願衷雅厚以立詞  
協聲情以振采毋惑乎俗尙毋拘乎漢唐他日積元圃之  
夜光樹赤幟而成隊雄鳳吐曉鶉吭自暗燭龍攄輝螢熠  
俱熄甚盛事也茗煙依依願言良覲寒雲禿木相思渺然  
率意奉復幸垂省覽



雷園詩序

夫楚南淪鐵不湮金字之輝龍門枯桐終傳綠絃之奏吾  
邑雲雷吳君紉蘭爲佩緝瓊成詞夙播龍鸞之聲早赴旌  
鶴之召杜栖風韻乃損其遐齡賈生祖謝僅逮乎壯歲其  
遺詩二卷長君少雲發自古錦登之文黎亦庶幾憫荃靈  
于宵途標芬幟于騷壘矣戎葵旣經珍鏤告燬少雲旋亦  
謝世于是次公子子湘軫青箱之先業慮流煙之等澌爰  
繼伯氏謀付重刊屬僕重爲訂定竝加弁焉觀其瑤霞鬱  
霄銖露濯穎纂組薜芷鑪鍾煙雲覺春氣于靜夜思發花  
先翦秋光于卷中句比竹秀水容荷氣時涉左司之庭長  
遂殘星或效倚樓之格亦有箜篌劍子之篇錦瑟碧城之

製隴西鬼語破青霓于翠扇樊南綺情嚼紅霞于笙夕輶  
元圃之玉詎襍砮砮微鄧林之材皆成奇木然而寶臺冰  
魄以勤拂而益明太清縞輝去微雲而增朗燦珠字于寸  
帙畱羽彩之片光刪其什二足以傳矣僕出稍後未及與  
君游然竊聞其風流文采照映湖山濯濯春柳王恭少年  
朗朗玉山叔則爽概林嬉水宴之會時啟乎琴觚紫裘白  
袷之倫咸洽其襟抱仙之人矣心也慕之光什具存一再  
尋翫錦心所吐高歌如見其人通眉不凡清霏實異其賦  
自君之往三紀于茲冥冥花城沈沈海屋龍梭何處疑化  
秋空之雲鶴骨不肥聊奏梅花之引

游仙華山記

浦江四面皆山宮霍環互翠凹蒼凸其最勝者爲寶掌仙  
華二山仙華在邑之西南隅軒轅少女元修學道處也故  
又名少女峰五峰插霄簦若萼若煙曛雲且晶黝萬變予  
權學官之明年壬申春二月偕邑人陳廣文洛川樓山長  
師竹往游焉宿雨乍晴初陽在樹芳艸地輒筍兜若移出  
郭不遙蒼秀在目黛壁雲繚如列屏障怒湍雪吼恍聞雷  
聲山杏綴齟古香忽來谿柳搖碧沙水自照危棧一綫盤  
若修蛇鼻卵圓石時訝砌錦龍形怪枯橫來攫衣三里許  
得小厝榜曰古仙華厝檐宇不深神鬼畫壁惟山有祇此  
以祀也越厝而東徑轉寬襍樹離立傾厓四垂奇柯孕葩

雲過疑蝶稚松鋪綠風來成潮仰望虹棟龍薨亭亭蝶蝶  
翼霞冠斗則少女殿也近殿之西爲須毛二公祠須公明  
季邑令創禪宇於此曰竹林寺而以前殿祀少女曰昭靈  
宮

國朝康熙間邑令毛公復增拓之重寮沓閣遂成巨觀兵  
火後惟少女殿及羅漢堂尙存傾圮亦半矣少女服冠帔  
秉青圭黼袍花釵類后妃之狀金鈴黃幡繡夫人之字是  
日邑人以香楮至者極眾云少女甚著靈異也寺僧設茗  
坐憩片時殿東居人數十家曹翁者與洛川善來相謂曰  
是山之奇在三巖自此而上三四百武爲第一巖雙崖夾  
立削若無路一穴洞啟是謂天門過天門爲二巖桀壁數

仞有罅相錯昔纏鐵縵今惟古藤攀援而上則第三巖所  
謂仙華第一峰也遂相引出殿東徑極削劣輿不復能行  
從人掖以登雙屨欲穿一層始達莎髯純紫石骨益青烈  
風虎吼勢將吞人孤雲鶴盤意若媚客悸神乍定遐眄斯  
展羣山東奔波濤起伏修谿四映練素縈折平林薺列遙  
落碁布山城春圓縮寸楮于花際崇圖碧峭立尺幢于鳥  
下振袂長歎疑非人間曹翁請窮其勝翹視怪愕嵌空色  
狀積鐵靈氣時露當爲神棲之境履迹所到疑惟肉飛之  
仙同人皆色駭舌橋謝不敢而童輩乃賈勇以登呼之亦  
不能止見其蛇行入天門迴嶂合邃人景倏隱裂石漏響  
語笑忽墮久之乃見立第一峰最高頂其出入之狀誠鄙

道元所謂晷沒霞舉矣待其下亟詢之則云入天門有古洞廣才二尺窅然而深投以石聲隆隆逾刻不絕上又有石屋題爲少女修真處煙骨琢玉雪乳滴珠老蝠晴紅古螳冠赤陰森峯廡不敢久憩猿綠鳥升心飛魄越遂陟重峭躋乎極巔天飈吹面奇寒砭骨時有雨片飄落衣袂予與同人在第一巖固不覺有雨然視其衣猶斑斑然知不誣矣時已及申曹翁邀飲于其家土屋向陽杉扉臨澗木牀竹几淨無纖埃呼兒鬪筍因攜白木之鑿移尊就花乃啟黃雞之局酒裏旣暢異品斯登翠轆海苔厚俾蒼耳主人曰此名石衣產三巖采之極難味清而腴香冷而郁洵乎露華雲氣之所長養非凡品也斜陽欲沈山雨將至主

客罷酌輿人促行乃攜嘯侶循歸徑下坡勢疾翩若驂鸞行未半時山隔數里蒼蒼原野牛笛未歇暝暝村樹春燈已明風迴寺鐘雷動城鼓寓廬不遠蒼頭來迎入門笑言見輩詫慕中夜聽檐溜浪浪幸尋勝之及時想靈境之在目因泚筆記之將歸以夸同人也

王叔彝觀察詒安堂詩三集序

上海王叔彝觀察既刻其詒安堂詩初二集矣雲瓊千楮  
神丹九還積元圃之夜光樹芬林之特幟丙寅之春又集  
其十年之作爲三集來徵弁言羽聲忽起蒼涼燕趙之歌  
墨雨一揮紫彩魚龍之色有感而發每變益工愈唱愈高  
去天三尺蓋君以颯爽之英姿值倥偬之戎馬秋風戰伐  
中宵野哭之聲黑月關山萬里羽書之警江國之重圍屢  
合故園之喬木都非得毋盼金狼之燄夢繞矛頭聆櫓馬  
之嘶感生髀肉者乎無何霜袍叱馭墨騎提軍劔十萬以  
橫磨戰一日而屢合雲中鐘鼓令巖細柳之營帳下琵琶  
春滿蒲桃之酒雪夜艸磨盾之檄秋城吹呼月之笳莫不

風雲壯裏蛇鳥變色及乎盜塚始剗漕轉宐時趙肅本洛陽主人礮石領海中專督銀濤萬壘神魚拜樓艦之旂金霞五更天雞叫扶桑之日是又奇雲怪霧盪其心胷北鯤東龍恢此眼界者也于是酒酣斫地浩歌寄懷撼風雨于齒牙馳雷霆于腕底擬漢家之朱鷺怒角爭鳴叱大壑之潛驪神珠入手龍虎百鍊鬱成宵練之光咳唾九天發此靈夔之吼且夫隨境造端者詩人之善變也情動言形者天真之莫掩也今者兼領茶綱言居蓬島荒蘆城郭官柳重栽小隊郊垌翳桑徧問遂啟琴觚之會時聯袂展之歡梅花東閣非無水部之詩艸木殘黎大有道州之詠藹然仁者穆如清風亦風人之旨矣詒壽掩關西枝之廬拾其

南山之豆野亭花好喜車騎之能來官舫鐙紅渺雲山其欲阻時君奉檄攝睦州守將之官載披瓊什有感瑤情語愧雕龍引慚前馬明月千里結思在金沙翠嶂之閒白雪一編置君當玉局南湖而上

蘭谿畱別陳芷濱學博序

歲在荒落序入素秋言自浦汭于役婺州旋理虎林之帆  
暫倚穀渚之棹芷蕢學博煮松淥之藏酒埽棲塵之吟榻  
殷然畱止信宿笑言幽館宵寂共此燭光疏櫺月來顧見  
花影蘭語既洽苔契彌深剖襟意長疊鼓更促桑雞忽唱  
城烏亂唳晨光熹微榜人破戶駕言欲邁握手歛獻逢舊  
雨以何時悵西風之催別嶺雲千疊江天一涯誰能遣此  
良足感矣昔者長山之麓冷署之中僕與子一鐸共秉五  
步隔居蛩蛩趨公連翩署牘登元暢之高樓則蹋臂雲際  
訪初平之古洞則聯屐煙外衣幘互易不問主人鯽雁偶  
登亦呼共食其或風雨相對宵漏正長澆劍酒紅說鬼鐙

綠發論小選齟齬益見其真掬裏畢宣肝腑亦可共倒當  
此之時別無半時語輒通昔西窗話雨笑樊南之空懷東  
野爲龍譏昌黎之虛願旣而秋風解組南山歸臥莫雲憶  
女夕月愁余乃積緒在抱未盈扶寸奉檄而喜又共一州  
仁山講學之鄉待制吟詩之地一日可至百里匪遙筠筒  
緘詩走長髯而卽達篋輿乘興呼健足而成行又以應官  
輒共趨郡清谿楓樹聯吟吹笛之船候館梅花抵足垂鐙  
之夕雖勞行役藉補墜歡觀止之懷良用告慰今者金飈  
戒寒瓜期又屆感青瑣之無定去太匆匆恨黃帽之催人  
行何艸艸數日作惡共值謝公之年千里相思莫必嵇生  
之駕茫然此別渺矣余懷吾子笙簧典籍擣齧道真早騁

雲衢樂就冰職鶴田所入足給饗餼雁幣有登用娛賓客  
姬人不俗稚子能文庭栽好花架羅良籍人生得此良亦  
愜情獨念僕自遭寇亂世業俱空居無下溼之可徵出僅  
微官之暫試餓麟不噬窮猿安投襪被江關正不知稅駕  
何所耳僕行矣晨催星飯夕擁霜衾言尋寓廬明湖之潯  
望子不見山高水深毋金玉爾音而有遐心歲寒之設分  
綦合襟敬勛光彩共葆璧琛



秋感賦

秋風蕭騷秋氣沈澀衰艸滿地涼雲卷霄螢催杼以號冷  
雁迎霜而警宵撫瑟瑟之金序驚駸駸之赤鑣莫不觸秋  
心之縹緲感秋士于寂寥于是僕本羈人悄焉不樂升亭  
皋而四顧見木葉之亂落渺江波之淼淼嗟吾身之安託  
颯素絲之垂頸感朱顏其非昨溯盛歲之跌蕩翩奇服而  
翱翔風鳴走馬之埒花簇鬪雞之場鉤藏狎客之坐箏彈  
秋拍之堂飛觥揚衷崑崙低昂任四序之遷易恣吾樂其  
未央羌負氣以自豪夙兀臬之性擅騰黃馬之劇談啞繡  
虎之名彥輕金影若埃塵叱等儕猶廝賤致三公于元鬢  
驅八騶于華甸若吾身所固有誠取攜之甚便無何青春

已去素志漸非白壁蒙屢削之恥金門無可破之機麟不  
噬而毛誰落鳥三匝而枝何依長落落其寡合畏世路之  
險巖况乃狐鳴嗚叫霧合雲傾丁東南之變亂紛豺虎之  
縱橫窮海呼天之哭荒山赤足之行魂乍返而復逝身九  
灰而一生愧艸閒之偷活屢鶴駭而風驚泊龍驤之揚武  
始螻腥之漸埽尋故廬于北郭覲榛莽之塞道日慘慘兮  
鬼氣寒煙寂寂兮人迹少勉絢葦以結茅亦綴荻以成襖  
何落穗之可拾惟白骨與秋艸吁嗟乎流離頻歲荏苒中  
年修羅之綺夢初醒翳桑之僵餓誰憐託生涯于寸管賸  
故物之一氈既不能索長安之米又不能復下溟之田獨  
抑鬱而誰語徒悲歌而問天昔之馬劍豪徒楮硯良侶莫

不奮青雲振逸羽佩玉珂登瑤序噓溫氣而成雲澤赤眦  
而爲雨余獨何爲命舛心違捫此足而有鬼非太阿其孰  
知馬縮縮而如狗鳳啾啾兮在羈將上破乎帝宮虎守關  
而嶷嶷將通詞于真宰又魑魅之見欺心搖搖其若縣身  
俛俛以何之感復感兮歡情稀秋復秋兮老將至倏百年  
之易邁孰千禩而無灰羌煩憂之鑠人豈金石之足恃彼  
毛角之自得任山嬉而林止何人生之不如良有愧此頂  
趾亂曰艸木黃落兮天地秋雲冥冥兮生暮愁愁之來兮  
不可輟吾將逝兮山之幽采碧苔兮餌蒼朮拍洪厓兮挹  
浮邱朝吾策兮青鹿夕吾駕兮斑蚪狎神洲之龍鵠唾塵  
海之蜉蝣杳不知秋來與秋去兮樂于萬歲而優游

王觀察誄

惟同治六年十月二十有三日浙江補用道署嚴州府知府王公粹子嚴州府署春秋五十有四得訃驚悼爲位而哭嗚乎哀哉公名慶勳字叔彝又字菽畦上海人也長公作宦愛住西湖元相題詩曾居蓬島結知交于文字等簪紱于煙雲壽以淺才尤承嘉契讀孔頴之製折簡彌殷憫方干之貧歲遺不絕苔情旣洽竹心益虛每有製作輒就商榷壽感其誠意時貢芻言其所箸詒安堂詩三集十卷柳步詞二卷越州唱和集二卷皆壽所刪定竝爲序言相得之歡有殊恆等今年春壽有長山之役公亦攝守睦州悵雲龍之莫逐江水渺其相思喜鱗羽之可通餐飯勉以

努力十日之飲約以平原一葦之杭招之舟子壽始以官  
守之羈繼趁歸帆之利江城再過一刺未通方用歉然而  
公之凶問至矣嗚乎哀哉梅花官閣綺席方開夜月瑤天  
玉棺遽下西風蕭瑟客散孟嘗之門往事淒涼悲甚黃壚  
之酒長淮水涸玉樹寒埋一曲廣陵永絕嵇康之散千年  
城郭難期丁令之歸凡在同人莫不哀涕猥爲知己詎得  
無言爰識素旒以抒悲感詞曰

嗚乎王公德門世澤胄係瑯琊采振頰璧麟篆杜捫鹿角  
匡折分才論斗讀書計尺壯而奮迹龍翔鳳搏妖鳥晝嘯  
丁于時艱樓船江表鐵騎中原公練勅旅鳥張蛇盤十蕩  
十決雄劔嘯呼再戰再捷揚矛飛弧法兼程李膽落孫盧

防江截渚心雄萬夫新息雅歌叔子緩帶時聞鬪聲不絕  
吟籟黃塵一曲蒼鼉三搥磨墨盾鼻起艸牘背猗與王公  
邦國之彥鷹武旣揚鴻伐斯建粟漕紫瀾道捷赤甸鶴鱸  
春飛鯨波夜晏

天子明聖爰酬其勤虎符乃剖豸服更新惟浙東西公牧  
其民惠風儲抱澄冰律身迢迢古郡巖巖睦州公來作守  
神父騰謳鄭轂挾鹿景聽放鳩以彼仿此今昔云侔歲惟  
甲子言埽蠹賊諸軍待餉不籌胡集晏主茶綱寬論鹽鐵  
公之駐越實惟是職越遭戎燹風雅蕩然公來振之招邀  
羣賢蠟檠刻玉麝笏騰煙巖壑生色雲鳥增鮮風施四載  
星明一路民沐其德士欽其度雲麾忽邁露冕不駐聿憶

黍膏羣謹棠護桐水碧澄橘嶺翠曼拔薤惟一儲竹近萬  
時嚴州有奸民結教匪爲亂大府以公先曾守嚴爲民所  
悅服故復調公攝府事公單車至其所諭以禍福黨卽解  
散遂禽其魁餘悉  
原之不安戮一人黃相再來彼州之翰寇公重借我民之  
願何期扈運龍蛇歲祖一星慘淡萬姓悲吁予尤感慟吾  
道之孤傷心冷瀨憶別春臚當公之行予亦奉檄睦之與  
婺一水所歷公起謂予期子良覲微雪梅花江城吹笛予  
謂此行江山頗奇詠樓懷古洞天題詩當爲公歌松淥傾  
卮豈意一別遂無見期茫茫天壤知音何處素帷雪暝丹  
旄煙曙風馳素車酒漬寒絮欲往從之靈筵告語嗚乎王  
公道阻且長山深月黑潦縮風孱神飛遠樹淚灑清霜臨  
風嗚咽徒倚窈皇

感逝吟序

嗚乎茫茫大地難逢青眼之人落落晨星易散素心之侶  
感浮生于埃露轉瞬百年邈舊游于山河傷心往日南樓  
老子胡牀邀夜月之歡東閣新詩水部結梅花之詠識李  
邕于金水江畔停車從子雲於元亭花邊載酒僑札定分  
則傾心于一言嵇呂相思則命駕乎千里酒徒擊筑非無  
燕市之歌仙侶題襟亦有漢南之會追惟儔好無閒生平  
送君南浦屢銷芳艸之魂臥病空山愁老桂花之樹霜鷗  
勅而林羽渙夕暉馳而薤英摧盼緜雲于天上徒聞躡影  
之談埋玉樹于土中曾無返魂之術青松示心之諒尙憶  
誓言金蘭告祖之編半成鬼錄嗚乎韋元量之制服曾爲

良朋范巨卿之驅車偏慚灰友難忘哀感艸長北岵之山  
還念生存淚甚西州之慟夢魂來于遠道落月青楓和鬼  
唱于秋墳淒風夜笛龍合延平之不再鶴歸華表以何年  
憶一人知己之語有感青蠅效三閭大夫之辭倘來玉駟

縵雅堂駢體文卷三目錄

游鳳鳴山記

重修仙華山昭靈宮碑

暨陽道中與沈學博書

仲泉遺詩序

曼志堂餘集序

退宜堂詩序


與秦勉鉏書

皋社聯吟集序

上徐少宗伯書

外祖沈香崑先生遺詩合鈔序

明處士吳慎直先生畫象贊



續雅堂駢體文卷三

山陰王詒壽眉叔著

游鳳鳴山記

晨風在柳秋雲卷空小雨既晴遙爽欲撲烏程王子蕭然  
陸生乃呼筇輿挈茗具邀余游鳳鳴之山山不見諸圖經  
在上虞東南相傳西漢時有女仙乘青鸞下降至今山無  
襍禽惟鸞則數千年來尚棲山中山之得名以此出郭七  
里綠谿數折激流鏡松蒼鬣煙櫺幽陔布蔞素英雪鋪山  
冢數十高下襍處黃泥牆矮古蘿半縈圓礫徑迴晚桂猶  
馥秋英四綴絳者黃者藍且紫者柔跗纖蕾率不知其名  
徑漸窄山亦漸深風泉蕩春林木吼應然竟不聞有鳥聲

穿林越澗磬石如鏡忽聞戛然轆笙駕管輿人噪曰鸞來  
驚視之則立石上引吭而鳴遂掠予輿過色青若染尾長  
倍身大裁如雞宛頸而纖喙余聞鸞爲百鳥長高至四五  
尺五采成章此或非是然厥音清和又山無他鳥其爲靈  
羽固無疑也過此漸不能輿舍而步雲片花媚停衣不飛  
柯葉雨墜隨屣而積旋螺屢轉陟榭百尺爲靈慧夫人廟  
卽乘鸞女仙也穹殿冠日邃廡宿雲黝鼎芝承古碣苔蝕  
菊有夢神祠廟僧云長至近時祈兆者踵相接也未至廟  
三十武許有洞曰雲虛豁窈窕煙閣翠豁果落戶際惟  
供猿餐風鳴宵中疑有龍守禪羅縵火燭之以入石牀瑩  
然纖埃不積蝙蝠千百見火而驚磔磔鼓翅掠幘拂面稍

深則森寒偏人火色漸碧心悸遂出不敢窮其勝也殿後  
雙厓桀起千仞駢峙飛瀑自其顛傾奔而下縣溜直注瀉  
珠百斛橫确忽阻激雪十丈其聲砰鎗洶怒對語不復能  
聞山之頂極平廣墾田十畝許廟僧自耕自食無租稅流  
泉漑之無旱潦其泉甚甘僧爇松枝潑薺供客踞石小憩  
若御碧雲撥煙下視悅隔塵界鸞又飛鳴來立殿檻上引  
喙理翅了不畏人注目弄音意類問訊夕陽催人折竹代  
杖遂理歸步促輿下山鸞復迴翔谷口若相送然余聞之  
虞人云鸞有靈性隱見無定亦莫知其止處游者或再三  
往始一見亦有老子虞數數往而終不得一見者余以萍  
迹偶事幽尋惟茲仙翮狎如鷗鷺豈再世瞿曇似曾相識



邪將仙山青鳥別有前因也噓亦異矣時在己巳九月十  
又二日余客上虞邑署

重修浦江仙華山竹林寺昭靈宮碑

若夫挹華嶺之玉漿明星祀古聆虞山之青羽虛洞雲寒  
天樂秋鳴金靄駐蒼梧之殿叢鈴夜語靈旂飄白石之祠  
女君仙子水畔停鸞玉蘭女郎江頭畱鶴亦有周王貴主  
棲霞術緜嶺之風唐室王姬金觀著青城之記莫不畱霞  
居于勝地標雲構于人間況乎隆古上真聖王妙裔班參  
翠水籙受紫清如元修夫人者乎夫人黃帝軒轅氏之少  
女也擢穎瓊枝棲心琳簡方帝之在位也神靈御宇祕要  
參真蘭葉朱文圖迎五色青邱紫府道訪三皇煉上藥于  
黃山玄袞挹浮邱之袖受丹經于玉笈青龍駐王屋之車  
具茨登而鬼神朝靈臺建而天人合靈蘭著論早探性命


之微神芝餌精遂證長生之果是則娥宮視膳雲汲先嘗  
兒野承芬神符早佩金母降真之日分寶鏡之餘輝素娥  
駐節之年聆瑤絲之浩奏不必追飛蹤于風雨侶結赤松  
固已悟真訣于崆峒名書青札矣及乎寶鼎告成髯龍下  
迓黃雲已逝翠輦不迴遂脫網乎濁途用潛蹤于幽嶂仙  
華山者東浙名岨西崑別岫林翔白鳳仍同阿閣之禽洞  
闕紅芝卽作太真之館青泥煮石黃月凝蕤結三花之祕  
光拜九宸之帝命霓旌一去丹岑萬年蘊異氣于煙霞企  
清芬于冰雪昔者勝國賢侯須公  
熙朝良令毛公景蹤靈軌結慕沖風始拓寶地于松關繼紮  
綠臺于蓮嶠如來金粟合仙佛爲一家玉女神林燦麟鬣

而五色旣号竹林之寺亦題昭靈之宮洞臺拜元君之眞  
社笛奏龍姑之曲蓋二百餘年于茲矣塵海逢災風輪轉  
劫金狼夜吼銅馬晨來戎燹旣經圯傾安免陰森敗壁時  
來拜月之狐蕭瑟秋林莫返駕颺之鶴暄肅屢易興葺久  
稽有心者慝焉則有譙國名流潁川魁彥周呼將伯首發  
宏施垂纓右族爭輸穴內之金積粟鼎門俱指囷中之玉  
乃至蓬頭野豎亦效丹剛桂斧之勞珠襪閨英竝來未利  
香纓之獻遂使朱檐冠斗繡戶生雲上界官府重開光碧  
之堂古佛道場無改紺林之舊以彼叢祠著柳芳觀呼梅  
楚江廟內桃花亦号夫人鍾陵山中甲帳猶居仙子幻生  
綺夢荒等巫雲雖錦締之增華方靈徽而滋愧况乎金銀

續齊東野語卷三  
四  
舊闕桑海新經神車所臨慧祐彌仰椒漿合霧桂奠趨風  
寶幢鸞繡香圍帝女之花祝鼓夔鳴音苔梵天之唄肅百  
靈而永衛合萬戶以同瞻詒壽往以冷曹曾趨山殿今聞  
盛事倍慕宏風遙想層城開丹苑白環之境慙無鑱骨誦  
流珠玉佩之經磨片石于重巖酬眾言于往諾傳夢中之  
綵筆敢承青版以摘詞聽天際之瑤笙願拜綠金而受簡  
銘曰

冥冥元橐寂寂靈囊疇悟道妙粵若古皇鼎湖一去攀龍  
勿及遺此王姬皜皜玉質仙華之峰白雲高寒服食煉氣  
合我神丹神丹既成羽軒上征畱徽瓊谷飛真玉清龍嵒  
穹宇颯沓靈衛獻荔陳蕉二百餘載游光夜嘯妖火來燔

豈不呵護曰有數存畫龍四壁雕螭萬礎惜此霞都半委  
煙莽爰選材木爰召工師虹廊鳳閣金碧重施寶掌豎右  
藥壺峙左林迴鐘迴花深幢鏤鴛藍金敞獅座香籠是惟  
法界卽在閩風肅瞻仙居敬念隆緝亭茗縹緲瑤宮之則  
在山之顛在谿之澗千秋勿蝕一片貞珉



暨陽道中與沈曉湖學博書

曉湖足下山城歲暮小駐行裝因索解斯之錢遂下陳蕃  
之榻言尋冷署晤我良朋追元度之迹十日何啻九詣樂  
公瑾之風醇醪不覺自醉加以舊雨今雨不約俱來長吟  
短吟有唱斯和萍蓬良會不圖至斯夫以僕之流連主人  
之情重豬肝匪累乎安邑鴻爪重循夫舊印畱度殘歲豈  
不甚願徒以老母倚閭內顧多累遂以一昨結被言歸亭  
午出浦江東門過七里亭重陰彌空若暝水墨山氣沍野  
微辨林徑截面風硬還步石稜輿行若舟艱于上水至白  
麟谿天已垂黑雨亦驟至遂投旅舍卸裝危樓壁閃枯蚌  
之鏡牀堆餅牛之艸酒薄難醉衾寒不眠迴念昨日之夕

洛川埽谿堂止吟侶煮香雪開清尊楫拙爐紅梅花窗小  
話洽覺春氣生坐酒酣喝明月倒行椽燭見跋繼以呼鏡  
雄雞三号尙惜放塵今昔之異聚散之蹤令人感喟次日  
昧爽冒雨復行四山裏雲合若無縫亂流爭澗喧而成雷  
溼煙撲眉淒寒砭骨躑躅岑曠艱苦逾等忽得村落恍睹  
宮府揖田媪而乞漿覓土銕以燎袂午度布穀嶺徑峭苔  
滑傾跌者再又十餘里至牌頭則入諸暨界矣風橫雨猛  
益不可行僕夫告瘁強復投止僕嘗三宿于此逆旅主人  
識之迎待甚殷燒花豬之肉煥綠螳之尊殷勤勸酬爲之  
醺然夜聽檐聲如潮凜颼撼屋駒聲四起若荅若和念我  
故人孤燭無寐諸君阻雨當不復集亮襄行旅同此悵結


篝鐙泚筆略述兩日所歷藉輿夫返報伏乞省覽不宣

仲泉遺詩序

仲泉遺詩一卷余友丁君吉庵所作也君影纓貴胄青箱舊業少竺志科第能爲章羅金陳之文旣屢抑于有司乃去而肆力于詩達夫始作見者卽歎其工汝士美才名輩皆爲所壓命儔獻侶刻蠟敝銅雅詞雲委雕章電發意氣跌宕千人蔽映粵寇之難余與君同避地于松谿三徑可通一井共汲蒼茫相對慷慨悲歌撻金揚旆劉孝標出塞之吟馬汗劒文李君虞從軍之詠遼東小婦託響于琵琶隴上壯士傷情乎流水亦有鶯花憶昔之篇關山懷遠之什春風一去喬木成煙故人不歸帶甲滿地落葉助其哀思孤鴻荅其酸嘶時而落日悵望秋風登臺白骨蔽野黃

雲千里漢將之旌旂不至樓船之笳鼓聞然念身世之浮  
漚痛風塵其未已我歌子和泣下沾襟泊乎元戎軫武妖  
星夜墮浙東郡邑以次平定余編北郭之茅君傲西枝之  
舍雖三里之水一葦可航然謀生方亟吟事轉稀矣又踰  
年泰興吳公來校士將舉拔萃之科以君高才逢此哲匠  
茂才異等國士無雙一黷之選非君誰屬卽君亦自信萬  
言之試足埽千人之軍乃竟不及與以疾遽歿悲夫江東  
昭諫終爲白衣之人隴西王孫已盡錦囊之血彌畱叔寶  
尙爾神清後至巨卿終慚灰友遺藁散佚今所錄者僅松  
谿唱和諸作風雨如晦虛堂秋寒展卷讀之如見其引杯  
斫劒抵掌激昂時也隻雞未奠痛迴三步之車片羽幸存

卽訂千秋之業



曼志堂餘集序

己巳之秋孫彥清孝廉既與其同門生胡何二君為其師  
 會稽曹文孺大令刻曼志堂遺詩四卷僕也青眼逢君早  
 結苔岑之契瑤編校字彌軫人琴之悲因又揆香其所作  
 律賦詩餘各十數篇都為一卷用作餘編夫其閒經緯以  
 為體合纂組以成文感物造端韻流采動玉臺作序孝穆  
 本天上之麟赤鸚鏤詞袁淑乃江東之秀若乃笛裏尋聲  
 花閒按譜雖無多妙製非其專長然而玉箏勸酒天涯芳  
 草之吟烏帽看山日暮碧雲之思丁卯春余以行省檄權  
 金華校官君既以詩贈  
 行又為譜金縷曲詞歌以佐祖觴玉金華校官君既以詩贈  
 箏烏帽芳草碧雲皆其詞中語也 金縷一曲銀燭三更  
 能不黯然是可念也猶憶其時江館夜寒行子將發君起



而言酒行且止充隱甚願樂飢難常雲龍上下此志終違  
勞燕東西相逢不易共明月兮千里援琴寫其素心指青  
山之片雲卜鄰期之他日及僕在婺州半歲之中尺書再  
至託響陂塘之柳結念河陽之花君寄陂塘柳詞有句云  
河陽一縣花千樹也許  
鰕生知君馳驅之志自此決矣既而秋試報罷遂果北行  
君先以優行貢成均教習八旂期滿改縣令至是謁選發  
四川待次夫以君貞亮淑資明通茂學假使漸鴻之羽排  
風早翔駮蕤紫微佩玉青瑣陪清塵于豹尾簪丹管于螭  
頭明廬視草甯非漢殿之才玉笈陳經卽是石渠之彥又  
使王尊叱馭竟度羊腸葉令乘雲不停鳧舄展其文雅澤  
之措施羅衡作萬年之宰棠界風清閭憲爲益部之官桃

街夜肅其所表見又豈僅在區區者天阨其遇又靳以年  
結裝將行嬰疾遽歿嗚呼埋愁地下治鬼泰山王子淵之  
諡固宜洞簫馬長卿之書誰求遺艸徒使扶風弟子緝賸  
錦于雲機山陽故人拾零璣于瓊圃良可悲矣君又工爲  
制舉之文其藁不自惜多爲人攫去它日覓得將更訂外  
編也

退宜堂詩序

吾友會稽孫君子九東南艾碩閱達雅才扶桑麟篆捫以  
九夜陳芳牛耳執之卅年嘗與論筆區之窳窳討吟苑之  
指歸以爲盛鬚豐黛詞縟者旨不深嶮石渴流意苦者格  
不茂憑玅利決風發電掣氣非不銳也而安雅之音舛矣  
頽蜺紺霧龍鬼虎神語非不奇也而性情之正失矣別僞  
親雅所得者深故其爲詩也儲體于潔吐詞必眞緩帶叔  
子之風褻裘太原之度少慕正始壯而彌篤奇玉專機溢  
積盈筭旣丁兵火流離海山奇胃所出還作煙雲之飛祕  
笈不緘乃爲鬼物所攝記憶追錄得其二三瑤樹千尺畱  
單柯而亦珍雕雲五色得膚寸而彌麗寇氛旣靖吾舌尙

存獨立蒼茫長歌慷慨復踰仙嶠溯劍津飢驅瘴厲之天  
老作諸侯之客登樓望遠彈鋏思家亦復流連光景徘徊  
雲壑天涯結侶客路逢春琴觚賞幽明月幔亭之酒藤蘿  
訪古落日尉陀之城竝抒鬱攸之衷俱流飈靄之韻牋雲  
穎露所積益富霜雪在鬢暖鶴相招南山歸臥泌水可樂  
乃訂其前後所作都爲一編靈芬溢抱清光照人把卷一  
吟口香三日君雅懷沖穆蕭乎物外麝丸棗尾白首隨身  
雲門若耶青鞵方始詒壽與君文字之契松寒彌貞方將  
厲牛鐸之奏以應黃鍾騰哈珠之熠藉引縞魄則後之所  
得固當未艾今此之訂亦曰甲編而已

與秦勉鉏書

勉鉏足下人日梅花綺筵銀燭劇飲疏香之室抵足畱鶴  
之盦踞談載霏瑤情斯暢元夕高軒見過適赴它招四更  
始歸殘檠暎壁畱札陳几蘭詞環諷巾車斯悔竝讀子珍  
擬天台山賦雲霞奇想鸞鶴逸響瓌色在牋寶氣騰室目  
眩心駭敢避三舍渡江以來春氣日暄校經之廬乃在蕭  
寺同人六七黃墨多暇午磬和吟晚鼓節詠餅花甌茗禪  
味可參下榻之室小如吳舫莎砌碧敦松戶翠駁蕉陰數  
尺瘞石一拳厯落點綴略無塵況又其地距皋園不一里  
風日熙美翔步林亭木蘭臨水半樹猶雪桃枝出竹數萼  
已絳登樹杪之崇樹覽雲鳥之變態奚奴挈榼園丁供茶


致足樂也惜不與足下共之耳詩文之事閒以自娛冠蓋  
之林視若畏阪到會城月餘僅一謁石泉中丞淡如都轉  
其它都無所詣張彥真有言苟不相知從物何益竊嘗深  
有味乎其旨矣盛春方屆園花競芳結畫鍾詩亮多佳興  
便郵略佈馳思爲勞

皋社聯吟集序

聯吟集一卷王子偕皋社同人聯句之作也夫鷓鴣互鳴  
上下于春日蛤蟀苔響抑揚乎素秋物既有類人亦屹然  
往者江東名輩濟陽逸才金粟後身柴桑妙裔當塗繡虎  
之彥扶風白眉之良結仙侶以同舟埽蘿徑而延賞微雲  
詞客卽爲池臺主人北郭先生亦預琴尊雅集于時碧艸  
倩晚鮮葩媚晨松雲十圍蒼雨一尺明蟾送影疏花隔簾  
睡鶴忽驚秋葉點瑟旣佳光景或事乎劇棊言羅茶瓜亦  
暢其清話雕書閒發逸情斯飛銅斗一聲琪花亂落柏梁  
之體敷藻于長吟石鼎之詠銖思于奇句矜一字之對則  
撚髭可斷得一言之工則擊節相賞時而乘興驅豪墨無

停綴風雨沓至如塵昆陽之軍後先勿讓若爭黃池之長  
哈笑竝作仙鬼互夸擲地有聲拍案叫絕羊胛可換何嗔  
乎短奚雁頭爭鈔輒播之好事當是時也松陵之唱和竹  
谿之宴游以今方古詎多讓焉嗟乎易遷者咎緯倏逝而  
莫追至樂者友朋難萃而易渙流電一瞥浮雲百變曾幾  
何時而今昔頓殊出處各異或浮沈於郎官之署或勃宰  
于孝廉之船或橐管而飢驅或掩關而養疾芳艸千里望  
王孫其未歸絲雲不停傷佳人之已暮甚或卽幽路違昭  
途展其塵榻廬陵有遺編之悲過其舊廬山陽起鄰笛之  
感勝游易歇良覲難常今雨不來晨星可數欲求如向之  
披藻襟鼓吟吻斜簪散帶迭嘯互歌何可得哉何可得哉

涼風吹簾秋陰滿屋念我故人輾轉曷已因揆香曩日聯  
吟諸篇拊比成卷藏之篋衍冀它日者桑榆之日可娛萍  
蓬之蹤復合雖黃壚再過痛嵇生之先亾而夜雨一尊喜  
巴山之重話或將有鬪穎塵煙之舉抽黃對白之篇作此  
後勅唱而愈高雲璈一彈瑤響協絲簧之奏蠻牋五色玉  
籤題甲乙之編



上徐少宗伯書

竊聞綠綺在御不易遇者賞音黃土搏人不可移者天賦  
詒壽以孱材末學辱蒙明公加以拂拭重之以禮貌賞  
其兔園之冊褒之鳳鳴之音使瘦癯之節珍儷翹材砮砮  
之器價竝瓌璧昔者趙壹竊鳥袁逢抑三公之尊孔顛粗  
才元暉盛折簡之譽以今方古異時共情斯誠虞仲翔所  
謂天下得一人知己可以不恨者矣猶復列之剡章舉之  
天府謂足以陪弭管之末席奉屬車之清塵此在詒壽雖  
有慚推美之言而在明公實無忤事君之義何圖浮雲見  
蔽少微之星徒黃嚴譴偏加侍郎之衣幾白伏念  
聖朝中興麟鳳波委

綉牙堂集卷三  
關門之下和其聲以鳴

國家之盛者比隆于漢京如詒壽之凡陋誠何足言惟以不祥姓氏上累知已是用神忘氣結中夜惕惶然

聖明在上垂鑒不遠而海宇之內懷才孤露之士讀其奏艸當必有捩腕感激慷慨涕泗仰人倫之表慕宏獎之風思欲一接顏色而恨不能得者然則詒壽雖終無以致身青雲其得在陶育之中固生平之厚幸也詒壽少逢多難長丁亂離耕無下濕之田居賃西枝之舍龍泉知我每感彥深之言牛衣不眠見呵仲卿之婦紅勒十度黃齋半生往往天池欲近勁翅忽垂神山可登天風橫引斯則定命之窮不關乎人事此生自斷無待于問天明公雖有北海

薦禰之誠茂先推范之意其如詒壽之命何哉行旌遄發神與俱馳川平陸夷計已達都下長安天遠展謁何時略貢下忱無任依戀


外祖沈香巖先生遺詩合鈔序

外大父沈香巖先生名德耆艾通辯達才擅筆札之美長  
法家之言歷燕趙閩皖爲大吏重客者三十餘年亭疑鈞  
律飛章騰書清通簡要馨溢簪市博學多聞工于詩歌接  
武南湖追鑣玉局西園飛蓋之會南樓對月之集竝據賓  
坐跌宕賡唱道光閒孫平叔鄧嶰筠兩尙書以摛揆鴻彥  
出專疆圻與先生笙磬協音蘿袞遺分少陵之于鄭公樊  
川之于奇章相契之深無以加焉秋萼馳思叢桂招隱乃  
歸山陰舊廬闢小園于蓬萊之麓風月半亭半亭卽園中亭名琴  
畫一榻散髮花下披襟柳陰亦有浮螳新醅隻雞近局艇  
小呼臯客來如鷗相羊乎煙霞嘯歌乎林壑遂結梅花之



社招竹谿之逸江湖長翁谿南詩老禪師白拂道士元裳  
前喁後于此唱彼和詩益清奇真摯風發韻流不名一家  
去天三尺凡兩刻其集曰壽樟書屋詩鈔鄧尙書所訂定  
也其晚歲山居之作曰安邨集則同邑雪舫鄔先生所定  
者自先生歸道山去今三十餘年矣中經戎燹鄉國淪胥  
龍雷下呵縹緲無恙畸零珍棗乃非璧全壽思其久而或  
佚也敬加刪訂合爲一編用以作精華之別錄冀天地之  
長留焉客有見之者曰吾聞先生裹抱利器不自奮雲霄  
千金之聘緣手輒盡半刺之官掉頭長謝黃塵垂老青鞵  
終身故知先生者莫不欽其才之長而病其計之細若乃  
區區語言何係華瘁忍而爲此子胡爲者壽應之曰客休

矣高軒鶴覽望若神仙葩瓜道前藻旆擁後以昊宰視之  
一腐鼠也畫局黼帳燦然襍襲量珠斗綠標金錦黃以鬼  
伯觀之一浮漚也歲月水逝富貴雲浮古有不朽立言其  
一況先生之詩指事直陳卽境流唱可以待輶軒之采可  
以補志乘之缺固非特流連花月雕繪雲鳥而已也作者  
往矣遺文幸存傳之其人僕何多讓客謝曰有是哉默然  
而退壽遂書其緣起及荅客之語于簡端




明處士吳慎直先生畫象贊

公諱均禮字慎直周泰伯之裔也其先世爲越之蕭山人曾祖歡宋崇甯中進士歷朝散大夫江西轉運使爲贅壻于山陰壺觴村因家焉祖潤元至正中按察使考德二未仕遷家于州山懷信里公其仲子也幼籍豐華長耽清約悅志墳典敕躬禮則肥遜居貞不應徵辟天稟毅諒鄉里敬憚廉潔守道不苟一介子橫直節流聲于觥觥悅之清風彌慎乎小小以公方之古今何讓且夫膏用明煎麝以香焚出處不慎君子傷之當明祖龍飛之季燕邸虎嘯之先文峻網密如火斯烈士之挂朝籍者往往文字階旣縞紵及殃妻孥流播枕馘荒遠公以艾碩生于其際體葡四

素家非單門卒能蟬蛻囂埃之中高臥愴囊之外保奠家  
室樂享曼年是非明哲違患曷以有此揚子雲之言曰鴻  
飛冥冥弋者何算焉言賢者隱處不離于害也公生于元  
至正甲申三月二日以明永樂癸卯三月二十日病瘁于  
里居春秋八十娶于周生四子淵潛誠安竝克秉義教無  
忝素風正統五年東南薦饑民就蒲羸淵承公志罄儲振  
之全活甚眾天子旌其義遣行人勞焉自是厥後行馬施  
門鳴蟬映鬢繼繼仍仍踵起勿衰蓋公之流澤長矣其族  
以公始立籍于邑以爲州山始祖二十二代孫某敬思本  
源瞻念規矩以畫象請同邑王詒壽爲之贊曰  
葆躬惟慙範趨以道言有壇宇行爲坊表惠荀一身慶在

百世磨鳳踵游金珪承志式瞻遺象粹然其容清淑之氣  
扶輿所鍾越山蒼蒼越水流長永仰潛惠俎豆馨香





3.2

100元

3.2

34  
300